

T 2511
8243

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

Handwritten vertical text, possibly a title or identifier, written in black ink on the right side of the cover.

領軍將軍仍從文帝復弘農破沙苑改封河內郡
虜中有信親屬始得父凶問乃發喪行服尋起為大將
督與馮翊王元季海入洛陽潁豫襄廣陳留之地並相
繼款附四年東魏將侯景等圍洛陽信據金墉城隨方
拒守旬有餘日及文帝至灑東景退走信與李遠為右
軍戰不利東魏遂有洛陽六年侯景寇荊州文帝令信
與李弼出武關景退即以信為大使慰撫三荆尋除隴
右十一州大都督秦州刺史先是守宰闇弱政令乖方
人有冤訟歷年不能決及信在州事無擁滯示以禮教



通志後唐及後晉卷之九 五
勸以耕桑數年之中公私富實流人願附者數萬家文帝以其信著遐邇故賜名為信七年岷州刺史赤水蕃王梁企定舉兵反詔信討之企定尋為其部下所殺而企定子弟仍收其餘衆信乃勒兵向萬年頓三交谷口賊併力拒守信因詭道趣稠松嶺賊不虞信兵之至望風奔潰乘勝追北徑至城下賊並出降加授太子太保芒山之戰大軍不利信與于謹帥散卒自後擊之齊神武追騎驚擾諸軍因此得全及涼州刺史宇文仲和據州不受代文帝令信率開府怡峯討之仲和嬰城固守

信夜令諸將以衝梯攻其東北信親率壯士襲其西南遲明克之禽仲和虜其六千戶送于長安拜大司馬十三年大軍南討時以蠕蠕為寇令信移鎮河陽十四年進位柱國大將軍錄前後功增封聽回授諸子於是第二子善封魏寧縣公第三子穆必要縣侯第四子藏義寧縣侯邑各一千戶第五子順武城縣侯第六子阡建忠縣伯邑各五百戶信在隴右歲久啓求還朝文帝不許或有自東魏來者又告其母凶問乃發喪行服信陳哀苦請終禮制又不許於是追贈信父庫者司空公追

封信母費連氏恒山郡君十六年遷尚書令六宮建拜
大司馬孝閔帝踐阼遷大宗伯進封衛國公邑萬戶趙
貴誅後信以同謀坐免居無幾晉公護又欲殺之以其
名望素重不欲顯其罪過逼令自盡於家時年五十五
信美風度雅有奇謀大畧文帝初啓霸業唯有關中之
地以隴右形勝故委信鎮之既為百姓所懷聲震隣國
東魏將侯景之南奔梁也魏收為檄梁文矯稱信據隴
右不從宇文氏乃云無關西之憂欲以委梁人也又信
在秦州嘗因獵日暮馳馬入城其帽微側詰旦而吏民
有戴帽者咸慕信而側帽焉其為隣境及上庶所重如
此子羅先在東魏乃以次子善為嗣及齊平羅至而善
卒又以羅主嗣信長女周明帝敬后其季女隋文帝獻
后獨孤氏自周隋及唐三代皆為外戚自古以來未之
有也隋文帝踐極乃下詔褒贈太師上柱國十州諸軍
事冀州刺史封趙國公邑一萬戶謚曰景追贈信父庫
音使持節太尉上柱國六州諸軍事定州刺史封越國
公邑一萬戶謚曰恭信母費連氏贈太尉趙恭公夫人
羅善等俱列在隋外戚傳

賈熾字光成扶風平陵人漢大鴻臚章十一世孫也章子統靈帝時為鴈門太守避竇武之難亡奔匈奴遂為部落大人後魏南徙子孫因家於代賜姓紇豆陵氏累世仕魏皆至大官父畧平遠將軍以熾著勲贈少保柱國大將軍建昌公熾性嚴明有謀畧美鬚髯身長八尺二寸少從范陽祈忻授毛詩左氏春秋畧通大義善騎射膂力過人魏正光末北鎮擾亂熾隨父畧避地定州沒於葛榮榮欲官畧畧不授榮疑其有異志遂留畧於冀州將熾及熾兄善隨軍及爾朱榮破葛榮熾乃將家

隨榮於并州時葛榮別將韓樓等數萬人據薊城不下以熾為都督從驃騎將軍侯深討之熾手斬樓以功拜揚烈將軍魏孝武即位蠕蠕等諸蕃並遣使朝貢帝臨軒宴之有鷗飛鳴於殿前帝素知熾善射因欲矜遠人乃給熾御箭兩隻命射之鷗乃應弦而落諸蕃人感歎異之帝大悅賜帛五十疋尋隨東南道行臺樊子鵠追爾朱仲遠奔梁時梁主又遣元樹入寇據譙城子鵠令熾擊破之封行唐縣子尋進爵上洛縣伯時帝與齊神武構隙以熾有威重堪處瓜牙之任拜閭內大都督遷

朱衣直閤遂從帝西遷仍與其兄善重至城下與武衛將軍高金龍戰於千秋門敗之因入宮城取御馬四十二并鞍勒進之行所帝大悅賜熾及善駿馬各二疋駕馬十疋大統元年以從駕功除東豫州刺史別封真定縣公從文帝禽竇泰復弘農破沙苑皆有功河橋之戰諸將退走熾時獨從兩騎為敵人所追至邙山熾乃下馬背邙山抗之俄而敵衆漸多三面攻圍矢下如雨熾騎士所執弓並為敵人所射破熾乃總收其箭以射之所中人馬皆應弦而倒敵乃相謂曰得此三人未足為

功乃稍引退熾因其怠遂突圍得出又從太保李弼討白額稽胡破之高仲密以北豫州來赴熾從文帝援之至洛陽會東魏人據邙山為陣文帝命留輜重於漚曲率輕騎奮擊中軍與右軍大破之悉虜其步卒熾獨追至石濟而還大統十三年進使持節驃騎大將軍開府儀同三司加侍中出為涇州刺史莅職數年政號清靜改封武安縣公魏廢帝元年除大都督原州刺史熾抑挫豪右申理幽滯每親巡壟畝勸人耕桑在州十載甚有政績州城之北屬有泉水熾屢經遊踐嘗與僚吏宴

於泉側因酌水飲曰吾在此州唯當飲水而已及去職
之後吏民感其遺惠每至此泉者莫不懷之魏恭帝元
年進爵廣武郡公屬蠕蠕寇廣武熾與柱國趙貴分路
討之蠕蠕引退熾度河追討至麴伏川追及大破之斬
其酋帥郁久閭是發獲生口數千孝閔踐阼拜柱國大
將軍明帝時以熾前朝舊臣勲望兼重欲獨為造第熾
辭以天下未平干戈未偃不宜趣發徒役明帝不許尋
而帝崩事方得寢保定元年進封鄧國公邑一萬戶別
食資陽縣一千戶收其租賦四年授大宗伯天和五年

出為宜州刺史先是文帝田於渭北令熾與晉公護分
射走兔熾一日獲十七頭護獲十一頭耻其不及因以
為嫌至是熾又以武帝年長勸護歸政護惡之故左遷
焉及護誅徵拜太傅熾既朝之元老名望素隆至於軍
國大謀常與參議嘗有疾武帝幸其第而問之因賜金
石之樂其見禮如此帝於大德殿將謀伐齊熾時年已
衰老乃扼腕曰臣雖朽邁請躬執干櫓首啓戎行得一
覩誅翦鯨鯢廓清宇宙省方觀俗登岳告成然後歸魂
泉壤無復餘恨帝壯其志節遂以熾第二子武當公恭

為左二軍總管齊平之後帝乃召熾歷觀相州宮殿熾拜賀曰陛下真不負先帝矣帝大悅進位上柱國宣政元年兼雍州牧及宣帝營建東京以熾為洛京營作大監宮苑制度皆取決焉大象初改食樂陵縣邑戶如舊隋文帝入輔政停洛陽宮作熾請入朝屬尉遲迥舉兵熾乃移入金墉與洛州刺史平涼公元亨同心固守仍權行洛陽鎮事相州平熾方入朝隋文帝初為相國百官勸進熾自以累代受恩遂不肯署牋時人高其節及隋文踐極拜太傅加殊禮贊拜不名開皇四年八月薨

時年七十八贈八州諸軍事冀州刺史謚曰恭熾事親以孝聞奉諸兄以悌聞及其位望隆重而子孫皆處列位遂為當時盛族子茂嗣茂有弟十三人恭威最知名恭位至大將軍從武帝平齊封贊國公除西兗州總管以罪賜死熾兄善以中軍大都督南城公從魏孝武西遷仕至太僕衛尉卿汾北華瀛三州刺史驃騎大將軍開府儀同三司永富縣公謚曰忠子榮定嗣榮定列在隋史熾兄子毅字天武父岳早卒及毅著勲追贈大將軍冀州刺史毅深沈有器度事親以孝聞魏孝武初起

家負外散騎侍郎時齊神武擅朝毅慨然有徇主之志
從孝武西遷封奉高縣子從禽竇泰復弘農戰沙苑皆
有功進爵安武縣公恭帝元帝進授驃騎大將軍開府
儀同三司大都督改封永安縣公出爲幽州刺史孝閔
帝踐阼進爵神武郡公保定三年拜大將軍時與齊人
爭衡戎車歲動並交結突厥以爲外援突厥已許納女
於周齊人亦甘言重幣遣使求昏狄人便欲有悔朝廷
乃令楊荐等累使結之往返十餘方復前好至是雖期
往逆猶懼改圖以毅地兼勲戚素有威重乃令爲使及

毅至齊使亦在焉突厥君臣猶有異志毅抗言正色以
大義責之累旬乃定卒以皇后歸朝廷嘉之別封成都
縣公進位柱國歷同州刺史蒲金二州總管加上柱國
入爲大司馬隋開皇初拜定州總管累居藩鎮咸得人
和二年薨於州贈襄郢等六州刺史謚曰肅毅性溫和
每以謹慎自守又尚文帝第五女襄陽公主特爲朝廷
所委信雖任兼外內未嘗有矜惰之容時人以此稱焉
子賢嗣賢字託賢志業通敏少知名宣政元年授使持
節儀同大將軍開皇中襲爵神武郡公除遷州刺史毅

第二女即唐太穆皇后武德元年詔贈毅司空使持節
總管荆郢等十州諸軍事荊州刺史祀國公又追贈賢
子紹宣秦州刺史并襲賢爵紹宣無子仍以紹宣兄子
德藏嗣

賀蘭祥字盛樂其先與魏俱起有乞伏者為賀蘭莫何
弟因以為氏後有以良家子鎮武川者遂家焉父初真
少知名為鄉里所重尚文帝姊建安長公主保定二年
追贈太傅柱國恒山郡公祥年十一而孤居喪合禮長
於舅氏時為文帝所愛雖在戎旅常博延儒生教以書

傳文帝初入關祥與晉公護俱在晉陽後乃遣使迎致
之解褐奉朝請祥少有膽氣志在立功尋擢都督常居
帳下從平侯莫陳悅又迎魏孝武以前後功封撫夷縣
伯仍從擊潼關獲東魏將薛長儒又攻回洛拔之還拜
左右直長進爵為公大統九年從文帝與東魏戰於芒
山進位驃騎大將軍開府儀同三司加侍中十四年除
都督荊州刺史進爵博陵郡公先是祥嘗行荊州事雖
未朞月頗有惠政至是重往百姓安之由是漢南流人
襁負至者日有千數遠近蠻夷莫不款附隨機撫納咸

得其歡心時盛夏亢陽祥親巡境內觀政得失見有發掘古冢暴露骸骨乃請守令曰此豈仁者為政邪命所在收葬之即日澍雨是歲大有年境內多古墓其俗好行發掘至是遂息祥雖文帝密親性甚清素州境南接襄陽西通岷蜀物產所出多諸珍異既與梁通好行李往來公私贈遺一無所受梁雍州刺史岳陽王蕭詵欽其風素乃以竹屏風絺綌之屬及經史贈之祥難違其意取而付諸所司文帝後聞之並以賜祥十六年拜大將軍文帝以涇渭溉灌之處渠堰廢毀乃令祥脩造富

平堰開渠引水東注於洛功用既畢，獲其利魏廢帝二年行華州事後改華州為同州仍以祥為刺史尋拜尚書左僕射六官建授小司馬孝閔帝踐阼進位柱國大司馬時晉公護執政祥與護中表少相親愛軍國之事護皆與祥參謀及誅趙貴廢閔帝祥有力焉武成初吐谷渾侵掠州郡詔祥與宇文貴總兵討之祥乃遣其軍司檄吐谷渾與吐谷渾廣定王鍾留王等戰破之因拔其洮陽洪和二城以其地為洮州撫安西土振旅而還進封涼國公薨贈太師同岐等十二州諸軍事同州刺史

謚曰景有七子敬讓璨師寬知名敬少歷顯職封化隆
 縣侯後襲涼國公位柱國華州刺史讓大將軍鄭州刺
 史河東郡公璨開府儀同三司宣陽郡公建德五年從
 平并州遷幽州刺史博陵郡公寬開府儀同大將軍戰
 歿贈上儀同大將軍追封清都公師尚明帝女位上儀
 同大將軍武始公入隋歷汴鄭二州刺史並著政績祥
 弟隆大將軍襄樂縣公隋文帝與祥有舊開皇初追贈
 上柱國
 此列伏龜字摩頭陀代郡西部人也其先為部落大人

魏初入附遂世為第一領人酋長至龜五世龜容貌瓌
 偉腰帶十圍進止詳雅兼有武藝嗣父業復為領人酋
 長魏孝昌三年以別將從長孫承業西征累遷金紫光
 祿大夫從還洛授都督遂為齊神武所寵任加大都督
 沙苑之敗隨例來降文帝以其豪門解縛禮之仍以邵
 惠公女妻之大統四年封長樂縣公自此常從征討亟
 有戰功歷侍中驃騎大將軍開府儀同三司恒州刺史
 卒子椿嗣椿字千年明帝時位驃騎大將軍開府儀同
 三司改封永世縣公天和初除左官伯進位大將軍

閻慶字仁度河陰人也曾祖善仕魏歷龍驤將軍雲州鎮將因家雲州之盛樂郡祖提使持節車騎大將軍敦煌鎮都大將父進有謀畧勇冠當世正光中拜龍驤將軍屬衛可瓌作亂攻圍盛樂進率衆拒守以功拜盛樂郡守慶幼聰敏重然諾風儀端肅望之儼然隨父固守盛樂頗有力焉拜別將後以軍功拜步兵校尉中堅將軍既而齊神武舉兵入洛魏孝武西遷慶謂所親曰高歡跋扈將有篡逆之謀豈可苟安目前受其控制也遂以大統三年自宜陽歸闕即拜奉車都尉稍遷後將軍

到安次縣子以功進爵為伯慶善於綏撫士卒未休未嘗先舍故能盡其死力屢展勲勞累遷散騎常侍驃騎大將軍開府儀同三司雲州大中正加侍中賜姓大野氏孝閔帝踐阼出為河州刺史進爵石保縣公州居河外地接戎夷慶留心撫納頗稱簡惠就拜大將軍進爵太安郡公入為小司空歷雲寧二州刺史慶性寬和不苛察百姓悅之天和五年進位柱國晉公護母慶之姑也護雖擅朝而慶未嘗阿附及護誅武帝以此重之乃詔慶第十二子毗尚帝女清都公主慶雖望位隆重婚

連帝室常以謙慎自守時人以此稱之建德二年抗表
致事優詔許焉慶既衰老恒嬰沉痾宣帝以其先朝耆
舊特異常倫乃詔靜帝至第問疾賜布千段醫藥所須
令有司供給大象二年拜上柱國隋文帝踐極又令皇
太子就第問疾仍供醫藥之費開皇二年薨年七十七
贈司空七州諸軍事荊州刺史謚曰成長子常先慶卒
次子毗嗣毗隋史有傳

史寧字永和建康表氏人也曾祖豫仕沮渠氏為臨松
令魏平涼州祖灌隨例遷於撫寧鎮因家焉父遵初

征虜府鎧曹參軍杜洛周構逆六鎮自相屠陷遵遂率
鄉里奔恒州其後恒州為賊所敗遵後歸洛陽拜樓煩
郡守及寧著勲贈散騎常侍征西大將軍涼州刺史謚
曰貞寧少以軍功累加持節征東將軍金紫光祿大夫
賀拔勝為荊州刺史寧以奉官為勝軍司隨勝之部會
荊州蠻騷動三鵞路絕寧先驅平之因撫慰蠻左翕然
降附尋除南郢州刺史及勝為大行臺表寧為大都督
攻梁下澧戍破之封武平縣伯及攻拔齊梁興鎮等九
城未及論功屬孝武西遷東魏遣侯景寇荊州寧隨勝

奔梁梁武帝引寧至香橙前謂之曰觀卿風表終是富貴我當使卿衣錦還鄉寧答曰臣世荷魏恩位為列將天長喪亂本朝傾覆不能北面事逆賊幸得息肩有道儻如明詔欣幸實多因涕泣橫流梁武為之動容在梁二年勝乃與寧密圖歸計寧曰朱异既為梁主所信任請往見之勝然其言寧乃見异申以投分之言微託思歸之意辭氣雅至异亦嗟挹為奏梁主果許勝等歸大統二年自梁歸進爵為侯久之遷車騎將軍行涇州事時賊帥莫折後熾寇掠居人寧率州兵與行原州事李

賢討破之轉東義州刺史東魏亦以胡梨苟為東義州刺史寧僅得入州梨苟亦至寧逆擊破之斬其洛安郡守馮善道州既隣接疆敵百姓流移寧留心撫慰咸來復業轉涼州刺史寧未至而前刺史宇文仲和據州作亂詔獨孤信與寧討之寧先至涼州為陳禍福城中吏民皆相率降附仲和仍據城不下尋亦剋之後遷驃騎大將軍開府儀同三司加侍中進爵為公十六年宕昌叛羌獠甘作亂逐其王彌定而自立并連結傍乞鐵忽及鄭五醜等詔寧率軍與宇文貴臣盧寧討之寧別擊

獠甘而山路險阻纔通單騎獠甘已分其黨立柵守險
寧進兵攻之遂破其柵獠甘將百騎走投生羌鞏廉玉
彌定遂得復位寧以未獲獠甘遂進軍大破之生獲獠
甘徇而斬之并執廉玉送闕所得軍實悉分賞將士寧
無私焉師還召寧率所部鎮河陽寧先在涼州戎夷服
其威惠遷鎮之後邊人並思慕之魏廢帝元年復除涼
甘瓜三州諸軍事涼州刺史初蠕蠕與魏和親後更離
叛尋為突厥所破殺其主阿那瓌部落逃逸者仍奉瓌
之子孫鈔掠河右寧率其妻擊獲瓌子孫二人并其種

落酋長自是每戰破之前後降數萬人進爵安政郡公
二年吐谷渾通使於齊寧擊獲之就拜大將軍寧後遣
使詣文帝請事文帝即以所服冠履衣被及弓箭甲稍
等賜寧謂其使人曰為我謝涼州孤解衣以衣公推心
以委公公其善始令終無損功名也時突厥木汗可汗
假道涼州將襲吐谷渾文帝命寧率騎隨之軍至番禾
吐谷渾已覺奔於南山木汗將分兵追之令俱會於青
海寧謂木汗曰樹敦賀真二城是吐谷渾巢穴若拔其
本根餘種自然離散木汗從之乃分為二軍木汗從北

道向賀真寧趣樹敦吐谷渾娑周王率衆逆戰寧擊斬之
踰山履險遂至樹敦樹敦吐谷渾舊都多諸珍藏而吐谷
渾主已先奔賀真留其征南王及數千人固守樹敦寧進
兵攻之僞退吐谷渾人果開門逐之因回兵奮擊門未及
闔寧兵遂得入生獲其征南王俘虜男女財寶悉歸突厥
吐谷渾賀羅拔王依險爲柵欲塞寧路寧攻破之而木汗
亦克賀真虜吐谷渾主妻子大獲珍物寧還軍青海與木
汗會木汗挫寧手嘆其勇決遺所乘馬令寧於帳前乘之
木汗親自步送突厥以寧所圖必破皆畏憚之咸曰此中

國神智人也及將班師木汗又遺寧奴婢百口馬五百
疋羊一萬口寧乃還州尋被徵入朝屬文帝崩寧悲慟
不已乃請赴陵所盡哀并告行師克捷孝閔踐阼拜小
司徒出爲荊州刺史荆襄浙郢等五十二州及江陵鎮
防諸軍事寧有謀略識兵權臨敵肯揮皆如其策甚得
當時之譽及在荊州頗自奢縱貪濁不脩法度嘗出有
人訴州佐屈法寧還付被訟者治之自是有事者不敢
復言聲名大損於西州保定三年卒於州謚曰烈子雄
嗣雄字世武少勇敢膂力過人便弓馬有筭略年十四

從寧於牽屯山奉迎文帝仍從校獵弓無虛發文帝歎異之尋尚文帝女永富公主除使持節驃騎大將軍開府儀同三司累遷駕部中大夫司馭中大夫從柱國枹罕公辛威鎮金城遂卒於軍時年二十四雄弟祥列在隋史

權景宣字暉遠天水顯親人也父曇騰魏隴西郡守贈秦州刺史景宣少聰悟有氣俠宗黨皆歎異之年十七魏行臺蕭寶夤見而奇之表為輕騎將軍及寶夤敗景宣歸鄉里文帝平隴右擢為行臺郎中孝武西遷授鎮遠將軍步兵校尉加平西將軍秦州大中正大統初轉祠部郎中景宣曉兵權有智畧從文帝拔弘農破沙苑皆先登陷陣轉外兵郎中從開府于謹援洛陽景宣督課糧儲軍以周濟時初復洛陽將脩繕宮室景宣率徒三千先出採運會東魏兵至司州牧元季海等以衆少拔還屬城悉叛道路壅塞景宣將二十騎且戰且走從騎畧盡景宣輕馬突圍手斬數級馳而獲免因投人家自匿景宣以久藏非計乃僞作文帝書招募得五百餘人保據宜陽聲言大軍續至東魏將段琛等率衆至九

曲憚景宣不敢進景宣恐琛審其虛實乃將腹心自隨
詐云迎軍因得西道與儀同李延孫相會攻拔孔城洛
陽以南尋亦來附文帝即留景宣守張白塢節度東南
義軍東魏將王元軌入洛景宣與延孫等擊走之以功
授行臺左丞進屯宜陽攻襄城拔之獲郡守王洪顯文
帝嘉之徵入朝錄前後功封顯親縣男除南陽郡守郡
隣敵境舊制發人守防三十五處多廢農桑而姦宄猶
作景宣至並除之唯修起城樓多備器械寇盜斂迹人
得隸業焉百姓稱之立碑頌德文帝特賞粟帛以旌其

能遷廣州刺史侯景舉河南來附景宣從僕射王思政
經畧應接既而侯景南叛恐東魏復有其地皆京宣為
大都督豫州刺史鎮樂口東魏亦遣張伯德為刺史伯
德令其將劉貴平率其戍卒及山蠻屢來攻逼景宣兵
不滿千人隨機奮擊貴平乃退走進授使持節車騎大
將軍儀同三司潁川陷後文帝以樂口等諸城道路阻
絕悉令拔還襄州刺史杞秀以狼狽獲罪景宣號令嚴
明戎旅整肅所部全濟獨被優賞仍留鎮荊州委以鷓
南之事初梁岳陽王蕭詵將以襄陽歸朝仍勒兵攻梁

元帝於江陵答叛將杜岸乘虛襲之景宣乃率騎三千
助答因是乃送其妻王氏及子焱入質景宣又與開府
楊忠取梁將柳仲禮拔安陸隨郡久之隨州城人吳士
英殺刺史黃道生因聚為寇景宣以英小賊可以計取
若聲其罪恐同惡者衆與士英書偽稱道生凶暴歸功
士英士英等信之遂相率而至景宣執而戮之獲其黨
與進攻應城拔之獲夏侯珍於是應禮安隨並平朝議
以景宣威行南服乃授并安肆郢新應六州諸軍事并
州刺史尋進驃騎大將軍開府儀同三司加侍中兼督

江比司二州諸軍事進爵為伯唐州蠻田魯嘉自號豫
州伯引致齊兵大為民害景宣又破之獲魯嘉以其地
為郡轉安州刺史梁定州刺史李洪遠初款後叛景宣
惡其懷貳密襲破之虜其家口及部衆洪遠脫身走免
自是酋帥懾服無敢叛者燕公子謹征江陵景宣別破
梁司空陸法和司馬羊亮於瀕水又遣別將攻拔魯山
多造舟艦益張旗幟臨江欲度以懼梁人梁將王琳在
湘州景宣遺書喻以禍福琳遂遣長史席壑因景宣請
舉州款附孝閔帝踐阼徵為司憲中大夫尋除基郡破

平四州五防諸軍事江陵防主加大將軍保定四年晉
公護東討景宣別略河南齊豫州刺史王士良永州刺
史蕭世怡並以城降景宣以開府謝徹守永州開府郭
彥守豫州以士良世怡及降卒一千歸諸京師尋而洛
陽不守乃棄二州拔其將士而還至昌州而羅陽蠻反
景宣回軍破之還次霸上晉公護親迎勞之天和初授
荊州刺史總管十七州諸軍事進爵千金郡公陳湘州
刺史華皎舉州款附表請援兵勅景宣統水軍溯江皎俱
下景宣到夏口陳人已至而景宣以任遇隆重滋驕傲

縱恣多自矜伐兼納賄賂指麾節度朝出夕改將士憤
怒莫肯用命及水軍始交一時奔北船艦器仗畧無子
遺時衛公直總督諸軍以景宣負敗欲繩以軍法朝廷
不忍加罪遣使就軍赦之尋遇疾卒贈河渭鄠三州刺
史謚曰恭子如璋嗣位至開府膠州刺史如璋弟仕玠
儀同大將軍廣川縣侯

王羆字熊羆京兆霸城人漢河南尹遵之後也世為州
郡著姓羆剛直木彊處物平當州閭重之魏天和中除
殿中將軍稍遷雍州別駕清廉疾惡勵精公事刺史崔

通志後傳列傳卷十九 廿一
亮有知人之鑒見羅雅相欽挹亮後轉定州啓羅爲長
史執政者恐羅不稱不許及梁人寇碓石亮爲都督南
討復啓羅爲長史帶銳軍朝廷以亮頻舉羅故當可用
及尅碓石羅功居多先是南岐東益氏羌反叛王師戰
不利乃拜羅冠軍將軍領羽林五千鎮梁州討平諸賊
授西河內史辭不拜時人謂曰西河大邦俸祿優厚何
爲致辭羅曰京洛材木盡出西河朝貴營第宅者皆有
求假如其私辦則力所不堪若科發民間又犯違憲法
以此致辭爾梁將曹景宗圍荊州勅羅與別將裴衍率

兵赴救遂與梁人戰大破之時諸方鼎沸所在凋殘荆
州新經寇難尤藉慰撫以羅爲荊州刺史進號撫軍將
軍封定陽子梁復遣曹義宗帥衆數萬圍荊州堰水灌
城不沒者數版時既內外多虞未遑救援乃遺羅鐵券
云城全當授本州刺史城中糧盡羅乃煮粥與將士均
分而食之每出戰常不擐甲胄大呼告天曰荊州城孝
文皇帝所置天若不祐國家使賊箭中王羅額不爾王
羅須破賊屢經戰陣亦不被傷彌歷二年義宗方退進
封霸城縣公元顥入洛以羅爲左軍大都督顥敗莊帝

通志後漢列傳卷之九 七二
以罷授顯官故不得本州更除岐州刺史時南秦數叛
以罷行南秦州事罷至州召其魁帥為腹心擊捕反者
畧盡乃謂魁帥等曰汝黨皆死盡何用活為乃以次斬
之自是南秦無復反者又詔罷行秦州事尋遷車騎大
將軍涇州刺史未及之部屬文帝徵兵為勤王之舉罷
請前驅効命遂為大都督鎮華州魏孝武西遷拜車騎
大將軍儀同三司別封萬年縣伯乃除華州刺史齊神
武率軍進潼關人懷危懼罷勸勵將士衆心乃安神武
退拜驃騎大將軍加侍中開府嘗脩州城未畢梯在城

外齊神武遣韓軌司馬子如從河東宵濟襲罷罷不覺
比曉軌衆已乘梯入城罷尚卧未起聞閣外洶洶有聲
便袒身露髮徒跣持一白挺大呼而出謂曰老罷當道
卧貉子那得過敵見之驚退遂至東門左右稍集合戰
破之軌衆遂投城遁走文帝聞而壯之時關中大飢徵
稅民間穀食以供軍實或有隱匿者令遞相告多被笞
捶以是人有逃散唯罷信著於人莫有隱者得粟不少
諸州而無怨讟沙苑之役齊神武士馬甚盛文帝以華
州要衝遣使勞罷令加守備及齊神武至城下謂罷曰

通志後周卷之九
何不早降羆乃大呼曰此城是王羆家生死在此欲死者來神武遂不敢攻後移鎮河東以前後功進爵扶風郡公河橋之戰王師不利趙青雀據長安城所在莫有固志羆乃大開州門召城中戰士謂曰如聞天子敗績不知吉凶諸人相驚咸有異望王羆受委於此以死報恩諸人若有異圖可來見殺必恐城陷沒者亦任出城如有忠誠能與王羆同心可共固守軍人見其誠信皆無異心及軍還徵拜雍州刺史時蠕蠕渡河南寇候騎已至豳州朝廷慮其深入乃徵發士馬屯守京城塹諸

街巷以備侵軼右僕射周惠達召羆議之羆不應命卧而不起謂其使曰若蠕蠕至渭北者王羆率鄉里自破之不煩國家兵馬何為天子城中遂作如此驚動由周家小兒恇怯致此羆輕侮權勢守正不回皆此類也未幾還鎮河東羆性儉率不事邊幅嘗有臺使至羆為設食使乃裂去薄餅緣羆曰耕種收穫其功已深春爨造成用力不少爾乃選擇當是未飢命左右撤去之使者愕然大慙又有客與羆食瓜客削瓜皮侵肉稍厚羆意嫌之及瓜皮落地乃引手就地取而食之客其有愧色

性又嚴急有吏挾私陳事者罷不暇命捶撲乃手自取
鞞履持以擊之每至享會親自枰量酒肉分給將士時
人尚其均平嗤其鄙碎罷舉動率情不為巧訐凡所經
處雖無當時功迹咸去乃見思大統七年卒于官贈太
尉都督相冀等十州刺史謚曰忠罷安於貧素不營產
業後雖貴顯鄉里舊宅不改衡門身死之日家甚貧罄
當時服其清潔子慶遠弱冠以功臣子拜直閣將軍先
罷卒孫述字長述少孤為祖罷所養聰敏有識度文帝
見而奇曰王公有此孫足為不朽解褐自外散騎侍郎

封長安縣伯後為鎮遠將軍拜太子舍人祖憂去職述
初喪父為罷所鞠養及居喪深合法度于時東西交爭
金革方始羣官遭喪者卒哭之後皆令起視事述請終
禮制辭理懇切文帝令中使就視知其哀毀乃特許之
免喪襲爵扶風郡公除中書舍人修起居注改封龍門
郡公周受禪拜賓部下大夫累遷廣州刺史甚有威惠
朝議嘉之就拜大將軍後歷襄仁三州總管並有能名
隋文帝為丞相授信州總管位上將軍王謙作亂遣使
致書於述述因執其使上書又陳取謙策文帝大悅前

後賜金五百兩授行軍總管討謙以功進位柱國開皇
初獻平陳計脩營戰艦為上流之師上善其能頻加賞
勞後數歲以行軍總管擊南寧未至而卒上甚傷惜之
贈上柱國冀州刺史謚曰莊子謨嗣謨弟軌太業末郡
守少子文楷起部郎

王思政字思政太原祁人漢司徒允之後也自魏太尉
凌誅後冠冕遂絕父祐州主簿思政容貌魁偉有籌策
魏正光中解褐負外散騎侍郎屬万俟醜奴宿勤明達
等擾亂關右北海王顥率兵討之聞思政壯健啟思政

隨軍事所有謀議並與思政參詳時魏孝武在藩素聞
其名顥軍還乃引為賓客遇之甚厚及登大位委以心
膂遷安東將軍預定策功封祁縣侯為武衛將軍俄而
齊神武潛有異圖帝以思政可任大事拜使持節中軍
大將軍大都督總宿衛兵思政乃言於帝曰高歡之心
行路所知洛陽四面受敵非用武之地關中有崤函之
固一人可禦萬夫且士馬精彊糧儲委積進可以討除
逆命退可以保據關河宇文夏州糾合同盟願立功効
若聞車駕西幸必當奔走奉迎藉天府之資因已成之

業一二年間習戰陣勸耕桑然後脩復舊京何慮不克
帝深然之及齊神武兵至河北帝乃西遷進爵太原郡
公拜光祿卿并州刺史加散騎常侍大都督大統之後
思政雖被任委自以非相府之舊每不自安文帝曾在
同州與羣公宴集出錦綉及雜綾絹數千段命諸將擣
捕取之物既盡文帝又解所服金帶令諸人徧擲曰先
得盧者即與之羣公擲徧莫有得者次至思政乃斂
容危坐而自誓曰王思政羈旅歸朝蒙宰相國士之遇
方願盡心効命上報知己若此誠有實令宰相賜知者

願擲即為盧若內懷不盡神靈亦當明之信不作也使
當殺身以謝所奉辭氣慷慨占對雄辯一坐盡驚焉即技
所佩刀橫於膝上攬擣捕拊髀擲之比文帝止之已為
盧矣徐乃拜而受帶自此之後文帝委寄重深轉驃騎
將軍募精兵從獨孤信取洛陽仍共信鎮之以橋之戰
思政下馬以長稍左右橫擊一擊輒踣數人則陷陣既
深從者死盡思政被重創悶絕會日暮敵亦收軍思政
以經軍旅每戰唯著破弊之甲敵人疑非將帥故得免
有帳下督雷五安於戰處哭求思政會其已歟遂相得

乃割衣裹創扶思政上馬夜久方得還軍仍使弘農除侍中東道行臺思政以玉壁地在險要請築城即自營厓移鎮之遷汾晉并三州諸軍事并州刺史行臺如故仍鎮玉壁八年東魏復來寇思政守禦有備賊人晝夜攻圍卒不能尅乃收軍還以全城功授驃騎上將軍開府儀同三司高仲密以比豫州來附文帝親往接之乃驛召思政將鎮成臯未至而班師復命思政詣弘農思政入弘農令開城門解衣而卧慰勉將士示一不足畏數日後東魏將劉豐生率數千騎至城下憚之不敢進乃

引軍還於是脩城郭起樓櫓營田農積芻秣凡可以禦者皆備焉弘農之有備自思政始也十二年加特進兼尚書左僕射行臺都督荊州刺史境內旱濕城墮多壞思政乃命都督蘭小歡督工匠繕脩之掘得黃金三十斤夜中密送之至旦思政召佐史以金示之曰人臣不宜有私悉封金送上文帝嘉之賜錢二十萬思政之去玉壁也文帝命舉代人思政乃進所部都督韋孝寬其後東魏來寇孝寬卒能全城時論稱其知人十三年侯景叛東魏擁兵梁鄭爲東魏所敗景乃請降乞師當

時未即應接思政以爲若不因機進取後悔何及即率
荊州步騎萬餘從魯關向陽翟文帝聞思政已發乃遣
太尉李弼赴潁川東魏將高岳等聞大兵至以軍而遁
思政入守潁川景引兵向豫州外稱畧地乃遣送款
於梁先是文帝遣帥都督賀蘭願德助景扞禦景既有
異圖因厚撫願德等冀爲已用思政知景詭詐乃密遣
追願德思政分布諸軍據景七州十二鎮文帝乃以所
授景使持節太傅大將軍兼尚書令河南大行臺河南
諸軍事回授思政思政並讓不受頻使敦喻唯受河南

諸軍事十四年拜大將軍九月東魏太尉高岳行臺募
谷紹宗儀同劉豐生等率步騎十萬來攻潁川思政令
城內卧鼓偃旗若無人者岳恃其衆謂一戰可圖乃四
面鼓譟而上思政選城中驍勇開門出戰岳衆不能當
引軍亂退岳知不可卒攻乃多脩營壘又隨地勢高處
築土山以臨城中飛梯火車晝夜攻之思政亦作火積
因迅風便投之土山又射以火箭燒其攻具賊乃退仍
募勇士縋而出戰岳衆披靡據其兩土山置樓堞以助
防守齊文襄更益兵堰洧水以灌城時雖有恠獸每衝

壞其堰然城被灌已久多亦崩頽岳悉衆苦攻思政身當矢石與士卒同勞苦岳乃更脩堰作鐵龍雜獸用厭水神堰成水大至城中泉湧溢不可防止懸釜而炊糧力俱竭慕容紹宗劉豐生及廿六將慕容永珍意以為閑其乘樓船以望城內令善射人俯射城中俄而大風暴起船乃飄至城下城上以長鉤牽船弓弩亂發紹宗窮急透水而死豐生浮向土山中矢而斃生禽永珍獲船中器械思政謂永珍曰僕之破亡在於晷漏誠知殺卿無益然人臣之節守之以死乃流涕斬之并收紹宗等

尸以禮埋瘞岳既失紹宗等心氣沮喪不敢逼城齊文襄聞之率步騎十萬來攻自至堰下督勵士卒水壯城北面遂崩溢滿城中無措足之地思政知事不濟率左右據土山謂之曰吾受國重任本望平難立功精誠無感遂厚王命令力屈道窮計盡所出唯當効死以謝朝恩耳因仰天大哭左右皆號慟思政西向再拜便欲自刎先是齊文襄告城中人曰有能生致王大將軍者封侯重賞若大將軍身有損傷親近左右皆從大戮都督駱訓謂思政曰公常語訓等但將我頭降非但得富貴

亦活得一城人今高相既有此言豈不哀城中士卒也
因共止之不得引決齊文襄遣其通直散騎常侍趙彥
深就土山遺以白羽扇而說之牽手以下及引見文襄
辭氣慷慨涕淚交流無撓屈之容文襄以其忠於所事
起而禮之接遇甚厚其督將分禁諸州地半數年盡死
思政初入潁川士卒八千人被圍既久城中無鹽腫死
者十六七城陷之日存者纔三千人既外無救援亦
無叛者思常以勤為務不營貨產嘗被賜園地思
政出征以種桑果雜樹還見而怒曰匈奴未滅

去病辭家况大賊未平何事產業豈所謂憂公忘私邪
命左右拔而棄之故身陷之後家無畜積及齊文宣受
東魏禪以思政為都官尚書儀同三司卒贈以本官加
兗州刺史初思政在荊州自武關以南延袤一千五百
里置三十餘城並當衝要之地凡所舉薦咸得其才子
康沉毅有度量後為文帝親信思政陷後詔以因水城
陷非戰之罪增邑三千五百戶以康襲爵太原公除驃
騎大將軍侍中開府儀同三司康弟揆先封中都縣侯
增邑通前一千五百戶進爵為公揆弟邗封西安縣侯

邗弟恭忠信縣伯恭弟幼顯親縣伯康姊封齊郡君康
兄元孫亦陷於潁川封其子景晉陽縣侯康抗表固讓
不許十六年王師東討加康使持節大都督以思政所
部兵皆配之魏廢帝二年隨尉遲迴征蜀鎮天水郡尋
賜姓拓王氏為鄜州刺史武成末除匠師中大夫轉載
師保定二年歷安襄二州總管位柱國入隋終於汴州
刺史

尉遲迴字薄居羅代人也其先魏之別種號尉遲部因
而氏焉父侯兜性弘裕有鑒識尚文帝姊昌樂大長公

主生迴及綱迴年七歲綱年六歲侯兜病且卒呼二子
撫其首曰汝等並有貴相但恨吾不見耳各宜勉之武
成初追贈柱國大將軍太傅長樂郡公謚曰定迴少聰
敏美容儀及長有大志好施愛士稍遷大丞相帳內都
督尚魏文帝女金明公主拜駙馬都尉封西都侯大統
十一年拜侍中驃騎大將軍開府儀同三司進爵魏安
郡公十五年遷尚書左僕射兼領軍將軍迴通敏有幹
能雖任兼文武頗允時望文帝以此深委仗焉十六年
拜大將軍侯景之渡江也梁元帝時鎮江陵既以內難

方盛請修隣好其弟武陵王紀在蜀稱帝率衆東下將
攻之梁元帝大懼乃移書請救文帝曰蜀可圖矣取蜀
制梁在茲一舉乃與羣公會議諸將多有異同唯迥以
爲紀旣盡銳東下蜀必空虛王師臨之必有征無戰文
帝深以爲然謂迥曰伐蜀之事一以委汝於是乃令迥
督開府元珍乙弗亞侯呂陵始叱奴興綦連雄宇文昇
等六軍甲士一萬二千騎萬死伐蜀以魏廢帝二年春
自散關由固道出白馬趣晉壽開平林舊道迥前軍臨
劍閣紀安州刺史樂廣以州先降紀梁州刺史楊乾運

時鎮潼州先已遣使詣闕密送誠款然恐其下不從猶
據潼水別營拒守迥遣元珍侯呂陵始等襲之乾運還
保潼州珍等遂圍之乾運降迥至潼州大饗將士度涪
江至青溪登南原勒兵講武脩繕約束閱器械自開府
以下賞金帛各有差時夏中連雨山路險峻將士疲病
者十二三迥親自勞問加以湯藥引之而西紀益州刺
史蕭撫嬰城自守進軍圍之初紀至巴郡遣前南梁州
刺史史欣景幽州刺史趙跋扈等爲撫外援迥分遣元
珍乙弗亞等擊破之跋扈等遁走欣景遂降撫被圍五

旬頻戰為迴所破遣使乞降許之搗乃與紀子宜都王
圓肅率其文武官屬詣軍門請見迴以禮接之其吏民
等各令復業唯收僮隸及儲積以賞將士號令嚴肅軍
無私焉詔以迴為大都督益潼等十二州諸軍事益州
刺史三年加督六州通前十八州諸軍事以平蜀功封
一子為安固郡公自劔閣以南得承制封拜及黜陟迴
乃明賞罰布恩威綏緝新邦經畧未附民夷懷而歸之
迴性至孝色養不怠身雖在外所得四時甘脆必先薦
奉然後敢嘗大長公主年高多病迴往在京師每退朝

參候起居憂悴形於容色大長公主每為之和顏進食
以寧迴心文帝知其至性徵迴入朝以慰其母意遣大
鴻臚郊勞仍賜迴衮冕之服蜀人思之為立碑頌德六
官初建拜小宗伯孝閔踐阼進位柱國大將軍又以迴
有平蜀之功同霍去病冠軍之義改封寧蜀公遷大司
馬尋以本官鎮隴右武成元年進封蜀國公邑萬戶除
秦州總管秦渭等十四州諸軍事隴右大都督保定二
年拜大司馬及晉公護東伐迴帥師攻洛陽齊王憲等
軍於芒山齊衆度河諸軍驚散迴率麾下反行却敵於

是諸將遂得全師而還遷太保太傅建德初拜太師尋
加上柱國宣帝即位以迴為大右弼轉大前疑出為相
州總管宣帝崩隋文帝輔政以迴位望夙重懼為異圖
乃令迴子魏安郡公惇齎詔書以會葬徵迴尋以鄭公
韋孝寬代迴為總管迴以隋文帝當權將圖篡奪遂謀
舉兵留惇而不受代隋文帝又令候正破六韓裒詣迴
喻旨密與總管府長史晉昶等書令為之備迴聞之殺
昶乃集文武士庶登城北樓而令之於是衆咸從命莫
不感激乃自稱大總管承制署官司于時趙王招已入

朝留少子在國迴又奉以號令迴弟子大將軍成平郡
公勤時為青州總管初得迴書表送之尋亦從迴迴所
管相衛黎毛洛貝趙冀瀛滄勤所統青齊膠光莒諸州
皆從之衆數十萬梁州刺史邵國公宇文胄申州刺史
李惠東楚州刺史費也頭利進國東潼州刺史曹孝達
各據川以應迴徐州總管司錄席毗與前東平郡守畢
義緒據兗州及徐州之蘭陵郡亦以應迴永橋鎮將紇
豆陵惠以城降迴迴又比結高寶寧以通突厥南連陳
人許割江淮之地隨文帝於是徵兵討迴即以韋孝寬

為元帥陰羅雲監諸軍虜國公梁士彥樂安公元諧化
政公宇文忻濮陽公宇文述武鄉公崔弘度清河公楊
素隴西公李詢延壽公于仲文等皆為行軍總管迥遣
所署大將軍石慈攻建州刺史宇文弁以州降慈迥又
遣西道行臺韓長業攻陷潞州執刺史趙威著城人郭
子勝為刺史上儀同赫連士猷攻晉州即據小鄉城紇
豆陵惠襲陷定州之鉅鹿郡遂圍恒州上大將軍宇文
威攻汴州上開府荳州刺史烏尼九開府尉遲儁率光
陰青齊呂充之衆圍沂州大將軍檀讓攻陷曹臺二州

屯兵梁郡大將軍東南道行臺席毗衆號八萬軍於蕃
城攻陷昌慮下邑豐縣李惠自中州攻陷永州焚之而
還宇文胄軍於洛口開府梁子康攻懷州魏安公惇率
衆十萬人入武德軍於沁東孝實等諸軍隔水相持不
進隋文帝又遣高頴馳驛督戰惇布兵二十餘里麾軍
少却欲待孝實軍半度而擊之孝實因其却而鳴鼓齊
進惇遂大敗孝實乘勝進至鄴迥與其子惇祐等又率
其卒十二萬陣於城南迥別統萬人皆綠巾錦襖號曰
黃龍兵勤率衆五萬自青州赴迥以三千騎先到迥舊

集軍旅雖老猶被甲臨陣其麾下兵皆關中人為之力
戰孝寬等軍失利而却鄴中士女觀者如堵高頰與李
詢乃整陣先犯觀者因其擾而乘之迴衆大敗遂入鄴
城迴走保北城孝寬縱火圍之李詢賀樓子幹以其屬
先登迴上樓射殺數人乃自殺勤惇祐等東走青州未
至開府郭衍追及之並為衍所獲隋文帝以勤初有誠
款釋之李惠先是自縛歸罪隋文帝復其官爵迴末年
衰羣惑於後妻王氏而諸子多不睦及起兵以開府小
御正崔達擊為長史自餘委任亦多用齊人達擊文士

無壽畧舉其多失綱紀不能匡救迴自起兵至于敗凡
經六十八日焉子寬大將軍長樂郡公先迴卒寬兄誼
開府資中郡公寬弟順以迴平蜀功授開府安固郡公
後以女為宣帝皇后拜上柱國封胙國公順弟惇軍正
下大夫魏安郡公惇弟祐西都郡公皆被誅而誼等諸
子以年幼並獲全唐武德中迴從孫庫部員外郎香福
上表請改葬朝議以迴忠于周室有詔許焉仍贈絹百
匹迴弟綱字婆羅少孤與迴依託舅氏文帝西討關隴
迴綱與母昌樂大長公主留于晉陽後方入關從文帝

征伐常陪侍帷幄出入卧内以軍功封廣宗縣伯綱驍
果有膂力善騎射文帝甚寵之委以心膂河橋之戰文
帝馬中流矢因而驚奔綱與李穆等左右力戰衆皆披
靡文帝方得乘馬大統十四年進爵平昌郡公廢帝二
年拜大將軍兼領軍及魏帝有異謀言頗漏泄文帝以
綱職典禁旅使密為之備俄而廢帝立齊王仍以綱為
中領軍總宿衛綱兄迴伐蜀從文帝送之於城西見一
走兔文帝命綱射之誓曰若獲此兔必當滅蜀俄而綱
獲兔而返文帝喜曰事平當賞汝佳口及克蜀賜綱侍

婢二人又嘗從文帝北狩雲陽見五鹿俱走綱獲其一
每從遊宴文帝以珍異之物令諸功臣射而取之綱所
獲輒多孝閔帝踐阼綱以親戚掌禁兵除小司馬又與
晉公護廢帝明帝即位進位柱國大將軍武成元年進
封吳國公邑萬戶除涇州總管歷位少傅大司空陝州
總管晉公護東討乃配綱甲士留鎮京師大軍還綱復
歸天和二年以綱政績可紀賜帛及錢穀等增邑以褒
賞之陳公純等以皇后阿史那氏自突厥將入塞詔徵
綱與大將軍王傑率衆迎衛於境首二年追論河橋功封

一子縣公四年薨于京師贈太保謚曰武第二子安以嫡嗣大象末位柱國入隋歷鴻臚卿左衛大將軍安兄運運少彊濟志在立功魏大統十六年以父勲封安喜縣侯明帝立以預定策勲進爵周城縣公歷位隴州刺史再遷武伯中大夫尋加軍司馬運既職兼文武甚見委任進爵廣業郡公轉右司衛時宣帝在東宮親狎諂佞數有罪失武帝於朝臣內選忠諒鯁正者以匡弼之於是以運為右宮正建德三年帝幸雲陽宮又令運以本官兼司武與長孫覽輔皇太子居守俄而衛刺王直

作亂率其黨龍齋蕭軍門覽懼走行在所運時偶在門中直兵奄至不暇命左右乃手自闔門直黨與運爭門斫傷運指僅而得閉直既不得入乃縱火運恐火盡直黨得進乃取宮中材木及牀等以益火更以膏油灌之火轉熾久之直不得進乃退運率留守兵因其退以擊之直大敗而走是夜徹運宮中已不守矣武帝嘉之授大將軍賜以直田宅妓樂金帛車馬什物等不可勝數四年出為同州刺史同州蒲津潼關等六防諸軍事帝將伐齊召運參議東夏底定頗有力焉五年拜柱國進爵

盧國公轉司武上大夫總宿衛軍事帝崩於雲陽宮祕
未發喪運總侍衛兵還京師宣帝即位授上柱國運之
為宮正也數進諫於帝帝不納反踈忌之時運又與王
軌宇文孝伯等皆為武帝親待軌屢言帝失於武帝帝
謂運預其事愈更銜之及軌誅運懼及於禍尋而得出
為秦州總管至州猶懼不免遂以憂薨於州贈大後丞
七州諸軍事秦州刺史謚曰忠子靖嗣運弟勤大象末
青州總管起兵應伯父迴勤弟敬尚明帝女河南公主
位儀同三司

王軌太原祁人也小名沙門漢司徒允之後世為州郡
冠族累葉仕魏賜姓烏丸氏父光少雄武有將帥材畧
頻有戰功文帝遇之甚厚位至驃騎大將軍開府儀同
三司平原縣公軌性質直慷慨有遠量臨事彊正人不
敢干起家事輔城公及武帝即位頗被識顧累遷內史
下大夫自此遂處腹心之任晉公護專政武帝密圖之
以軌沈毅有識度堪屬大事遂問以可否軌贊成之建
德初轉內史中大夫加授開府儀同三司又拜上開府
儀同大將軍封上黃縣公軍國之政皆參預焉五年武

帝親戎東伐軌從克晉州平并鄴以功進位上大夫將軍進爵郊國公又陳將吳明徹入寇呂梁徐州總管梁士彥頻與戰不利乃退保州城明徹遂堰清水以灌之列船艦於城下以圍攻取詔以軌為行軍總管率諸軍赴救軌潛於清水入淮口多置大木以鐵鎖貫車輪橫截水流以斷其船路方欲密決其堰以斃之明徹知之大懼乃破堰遽退翼乘決水之勢以得入淮比至清口川流已濶水勢亦衰船艦並礙車輪不復得過軌因率兵圍而蹙之唯有騎將蕭摩訶以二十騎先走得免明

徹及將士三萬餘人并器械輜重並就俘獲陳之銳卒於是殲焉武帝嘉之進位柱國仍拜徐州總管七州十五鎮諸軍事軌性嚴重善謀略兼有呂梁之捷威振敵境陳人甚憚之宣帝之征吐谷渾也武帝令軌與宇文孝伯並從軍中進趣皆委軌等宣帝仰成而已時宮尹鄭譯王端等並得幸於宣帝宣帝在軍中頗有失德譯等皆預焉軍還軌等言之於武帝武帝大怒乃撻宣帝除譯等名仍加捶楚宣帝因此大銜之軌又嘗與小內史賀若弼言及此事且言皇太子必不克負荷弼深以

為然勸軌陳之軌後因侍坐乃白武帝曰皇太子仁孝
無聞又多涼德恐不了陛下家事愚臣暗短不足以論
是非陛下常以賀若弼有文武奇才識度弘遠而弼比
再對臣深以此事為慮武帝召弼問之弼乃跪對曰皇
太子養德春宮未聞有過未審陛下何從得聞此言既
退軌謂弼曰平生言論無所不道今者乃爾翻覆弼曰
此公之過也皇太子國之儲嗣豈易發言事有差跌使
至滅門之禍木謂公密陳臧否何得遂至昌言軌默然
久之乃曰吾專心國家遂不存私計向者對衆良實非

宜其後軌因內宴上壽又將武帝鬚曰可愛好老公但
恨後嗣弱耳武帝深以為然但漢王次長又不才此外
諸子並幼故不能用其說及宣帝即位追鄭譯等復為
近侍乃出軌為徐州刺史軌自知必及於禍謂所親曰
吾昔在先朝實中社稷至計今日之事斷可知矣此州
控帶淮南隣接疆寇欲為身計易同反掌但忠義之節
不可虧違况荷先帝厚恩每思以死自効豈以獲罪於
嗣主便欲背德於先朝止可於此待死義不為他計冀
千載之後知吾此心大象元年帝令內史杜虔信就徐

州殺軌御正中大夫顏之儀切諫帝不納遂誅之軌立
朝忠恕兼有大功忽以無罪被戮天下知與不知莫不
傷惜時京兆郡丞樂運亦以直言數諫於帝

樂運字承業南陽滎陽人晉尚書令廣之八世孫也祖
文素齊南郡守父均梁義陽郡守運少好學涉獵經史
年十五而江陵滅隨例遷長安其親屬等多被籍沒運
積年為人傭保皆贖免之事母及寡嫂甚謹由是以孝
聞梁故都官琅邪王澄美之次其行事為孝義傳性方
直未嘗求媚於人臨淄公唐瑾薦之自柱國府記室為

露門學士前後犯顏屢諫武帝多被納用建德二年除
萬年縣丞抑挫豪右號稱彊直武帝嘉之特許通籍事
有不便於時者令巨細奏聞武帝嘗幸同州召運赴行
在所既至謂曰卿言太子如何人運曰中人也時齊王
憲以下並在帝側帝顧謂憲等曰百官佞我皆云太子
聰明睿智唯運云中人方驗運之忠直耳於是因問中
人之狀運對曰班固以齊桓公為中人管仲相之則霸
豎刁輔之則亂可與為善亦可與為惡也帝曰我知之
矣遂妙選宮官以匡弼之乃超拜運京兆郡丞太子聞

之意甚不悅及武帝崩宣帝嗣位葬訖詔天下公除帝
及六宮便議即吉運上疏曰三年之喪自天子達於庶
人先王制禮安可誣之禮天子七月而葬以候天下畢
至今葬期既促事訖便除文軌之內奔赴未盡隣境遠
聞使猶未至若以喪服受弔不可既吉更凶如以玄冠
對使未知此出何禮進退無據愚臣竊所未安書奏帝不
納自是德政不修數行赦宥運又上疏曰臣謹按周官
曰國君過市則刑人赦此謂市者交利之所君子無故
不遊觀焉則施惠以悅之也尚書曰災災肆赦此謂過

誤為害罪鉅大當緩赦之謹尋經典未有罪無輕重溥
天大赦之文故管仲曰有赦者奔馬之委轡不赦者痤
疽之礪石又曰惠者人之仇讎法者人之父母吳漢遺
言猶云唯願無赦王符著論亦云赦者非明世之所宜
有大尊豈可數施非常之惠以肆姦宄之惡乎帝亦不
納而昏暴滋甚運乃輿櫬詣朝堂陳帝八失一曰內史
御正職在弼諧皆須參議共理天下大尊比來小大之
事多獨斷之堯舜至聖尚資輔弼况大尊未為聖主而
可專恣已心凡諸刑罰爵賞爰及軍國大事請參諸宰

輔與衆共之二曰內作色荒古人重誠大尊初臨四海
德惠未洽先搜天下美女用實後宮又詔儀同以上女
不許輟嫁貴賤同怨聲溢朝野請姬媵非幸御者放還
本族欲嫁之女勿更禁之三曰天子未明求衣日旰忘
食猶恐萬機不理天下壅滯大尊比來一入後宮數日
不出所須聞奏多附內豎傳言失實是非可懼事由官
者亡國之徵請準高祖居外聽政四曰變故妨常乃爲
政之大忌濫刑酷罰非致安之弘規若罰無定刑則天
下皆懼政無常法則義無適從豈有削嚴刑之詔未及

半祀便即追改更嚴前制政令不定乃至於此今宿衛
之官有一夜不直者罪至削除因而逃亡者遂便籍沒
此則大逆之罪與杖十同科雖爲法愈嚴恐人情愈散
一人心散尚或不可止若天下皆散將若之何請遵輕
典並依大律則億兆之民手足有所措矣五曰高祖斷
雕爲朴本欲傳之萬世大尊朝夕趨庭親承聖旨豈有
崩未踰年而處躬奢麗成父之志義豈然乎請興造之
制務從卑儉雕文刻鏤一切勿營六曰都下之人徭賦
稍重必是軍國之要不敢憚勞豈容朝夕徵求唯供魚

龍爛漫士庶從役祇為俳優角抵紛紛不已財力俱竭
業業相顧無復聊生凡無益之事請並停罷七曰近見
有詔上書字誤者即科其罪假有忠謹之人欲陳時事
尺有所短文字非工不密失身義無假手脫有糾謬便
迫嚴科嬰徑尺之鱗其事非易下不諱之詔猶懼未來
更加刑戮能無鉗口大尊縱不能採誅謗之言無宜杜
獻替之路請停此詔則天下幸甚八曰昔桑穀生朝殷
王因之獲福今玄象垂戒此亦興周之祥大尊雖減膳
徹懸未盡消譴之理誠願詔譖善道脩布德政解兆庶

之愠引萬方之罪則天變可除鼎業方固大尊者不革
茲八事臣見周廟不血食矣帝大怒將戮之內史元巖
諫而獲免翌日帝頗感悟召運謂之曰朕昨夜思卿所
奏實是忠臣先皇聖明卿數有規諫朕既昏暗卿復能
如此乃賜御食以賞之朝之公卿初見帝甚怒莫不為
運寒心後見賞獲又皆相賀以為幸免虎口內史鄭譯
常以私事請託運不之許因此銜之及隋文帝為丞相
譯為長史遂左遷運為廣州滄陽令閏皇五年轉毛州
高唐令頻歷二縣並有聲績運嘗願處一諫官從容諷

議而性訐直爲人所排抵遂不被任用乃發憤錄夏殷
以來諫諍事集而部之凡六百三十九條合四十一卷
名曰諫苑奏上之隋文帝覽而嘉焉

列傳第六十九

通志一百五十六

